

李文忠公全書

奏稿

卷

二十七
二十八

李文忠公奏稿

卷之二十七目錄

張家口糧臺報銷摺

光緒二年二月十九日

派軍赴奉省摺

光緒二年三月初七日

卞長勝等赴德國學習片

光緒二年三月二十六日

籌運奉省雜糧摺

光緒二年四月初七日

張家口糧臺請餉摺

光緒二年四月初七日

蘆課請緩奏銷摺

光緒二年四月初七日

津關免解京餉摺

光緒二年四月二十七日

淮軍軍需報銷摺

光緒二年五月十四日
附清單

盤獲詐偽官員摺

光緒二年五月二十四日

派軍修築黃河新隄摺

光緒二年五月二十四日

威妥瑪決裂赴滬摺

光緒二年五月三十日

直境被旱救荒摺

光緒二年閏五月初六日

截留東漕片

光緒二年閏五月初六日

豁免民欠片

光緒二年閏五月初六日

海防支應請銷摺

光緒二年六月二十六日

馳赴煙臺日期摺

光緒二年六月二十七日

煙臺議結滇案摺

光緒二年七月二十七日
附函稿條款專條照會各件

繳還諭旨片

光緒二年七月二十七日

妥籌上海鐵路片

光緒二年七月二十七日

酌保隨員片

光緒二年七月二十七日

請出示保護遠人摺

光緒二年七月二十七日

請飭官吏講求條約片

光緒二年七月二十七日

請寬宥李珍國等片

光緒二年七月二十七日

查議滇邊通商片

光緒二年七月二十七日

李文忠公奏稿卷二十七

全集一之二十七

桐城吳汝綸編錄

張家口糧臺報銷摺

光緒二年二月十九日

奏爲光緒元年張家口糧臺用過銀兩造冊報銷恭摺仰祈

聖鑒事竊據口北道玉珩詳稱前於同治九年十二月在張家口設立糧臺請領部餉辦運各路征兵米糧所有用過銀兩截至同治十三年十二月底止業經四次奏銷奉部覆准在案今查光緒元年分侍衛承德所部察哈爾一軍因上年運發之糧尙敷食用並未辦運其駐紮烏里雅蘇臺之吉林黑龍江察哈爾官兵現存一千三百員名用過米價口袋等項駐紮庫倫之宣化古北口練軍二千五百九十名用過繩袋並糧臺應用各款春夏二季前署道博多宏武經管共計戶部應銷米價委員薪水各役工食賃房

價銀四千九百五十二兩工部應銷繩袋葦蓆銀八千八百四十八兩三錢六分已經博多宏武造冊詳請咨部嗣奉部覆用過銀數相符行令歸併一年奏報核銷其秋冬二季係該道玉珩經管共計戶部應銷米價委員薪水各役工食賃房價銀五千四十兩工部應銷繩袋葦蓆銀八千二百四十二兩八錢統計一年共用銀二萬七千八十三兩一錢六分查同治十三年報銷案內存銀二萬二百八十六兩九錢八分一釐又存部駁委員溢支薪水銀一百七十六兩新收部撥銀三萬兩除開銷實存銀二萬三千三百七十九兩八錢二分一釐又餘平項下舊管銀四百九兩五錢四分一釐新收銀二百四十八兩三錢五分二釐開除書吏工食心紅紙張銀三百三十六兩實存銀三百二十一兩八錢九分三釐統歸下次報銷等情造冊請奏前來臣覆核無異除造冊送部

外理合恭摺具陳伏乞

皇太后

皇上聖鑒敕部核銷施行謹

奏

派軍赴奉省摺

光緒二年三月初七日

奏爲遵

旨派撥馬步練軍赴奉省調遣恭摺仰祈

聖鑒事竊臣欽奉二月十四日

寄諭崇實奏請調古北口練軍一摺奉省通溝一帶現正辦善後事宜巡緝分防均關緊要該處兵力不敷分布著派撥古北口練軍步隊一營馬隊一百五十名統由熱河徑赴奉省等因欽此伏查直隸練軍無多庫倫奉天兩處先後撥調將及三千餉源亦形支絀本屬無可再調惟奉省邊防緊要自應竭力通籌暫行移緩就急當經飛咨提臣如數調派迅速前往茲據傅振邦覆稱遵於該部前左右三營步隊內挑選得力者合爲一營交游擊程楠森管帶於二月二十九日自口啟程其左寶貴原帶之馬隊百五十

名內幫辦官副將聶桂林現帶百名駐紮熱河朝陽下餘五十名
於三月初一日自口起程併歸聶桂林管帶統由熱河分起前進
咨報前來其應需月餉加支等項臣已飭局設法妥籌源源解濟
至奉省上年調去天津練軍馬步隊一千四百名古北口馬隊百
名今又添調馬步隊六百五十名直屬海防邊防皆形空虛臣並
緘商崇實察酌情形如該省邊務稍鬆卽分別凱撤以資扼紮而
衛畿疆除分咨查照外理合恭摺覆陳伏乞

皇太后

皇上聖鑒謹

奏

卞長勝等赴德國學習片

光緒二年三月二十六日

再臣遵

旨籌布海防疊經籌款定購西洋新式後膛鎗礮分發各營督飭
操練並轉託德國克鹿卜礮廠代雇德國都司李勸協來津與之
訂立合同議明三年爲期教習克鹿卜後膛鋼礮該都司悉心指
授礮隊操法日臻嫻熟現屆期滿銷差回國由臣優給川資並商
令李勸協帶同花翎游擊卞長勝等七人赴該國武學院講習水
陸軍械技藝俟學成回華再分撥各營教練以期漸開風氣李勸
協性情忠篤與卞長勝等相習已久慨然允行業與議定章程飭
卞長勝等會同李勸協於三月二十一日由津附搭輪船起程竊
維外交之道與自固之謀相爲表裏德國近年發奮爲雄其軍政
修明船械精利實與英俄各邦並峙而該國距華較遠並無邊界

毗連亦無傳教及販賣洋藥等事臣前晤該國駐京使臣巴蘭德謂中國如派人前往學習船政軍政彼國必當盡心教導是該國素敦友誼亟應及時聯絡師彼長技助我軍謀近年閩滬各局奏派學生赴英美等國游歷肄業無非爲實事求是力圖自強起見茲臣所派游擊卞長勝等久歷行陣素諳洋器更令出洋精求博覽兼有李勣協援引照料徧赴德國各廠局軍營及礮臺兵船切實考究以增益其所不能似亦造就人材之一法所需出洋用費應在海防經費內核實支銷其德國都司李勣協盡心教練著有成勞擬請

旨賞給二等寶星佩帶回國以示優異除由臣函屬德國公使巴蘭德轉致該國兵部外務大臣妥爲照護並緘商總理衙門仍將出洋員弁銜名籍貫造冊咨送外理合附片陳明伏乞

聖鑒訓示謹
奏

籌運奉省雜糧摺

光緒二年四月初七日

奏爲酌籌招商販運奉省雜糧以濟民食恭摺覆陳仰祈

聖鑒事竊臣欽奉三月初六日

寄諭御史余上華奏畿輔內外糧價漸增請豫籌采買一摺本年近畿一帶雨澤稀少糧價逐漸加增自應先時采買以裕民食著李鴻章體察情形並能否籌款於南省采買米石由海運津之處酌度具奏等因欽此伏查直境去冬今春僅得小雨雪數次皆未深透地土日形乾燥歲事甚屬可虞百姓以食爲天必應豫籌接濟惟南省多產稻米北人慣食雜糧上年江浙亦未豐收故海運米數較少若前往采買恐致價值增昂且直省庫項支絀萬分亦難籌此巨款向來畿疆民食多藉奉省雜糧聞奉省上年秋收中稔糧米來津駱驛不絕現津市小米每石合銀一兩八錢零小麥

每石合銀一兩六錢零棒子高粱每石合銀一兩一二錢其價尙不甚昂又合北方食性天津甯河一帶海船素以販運奉糧爲業民閒便於購買此外各屬郡邑凡河港可通之處並有槽子小船由津接運可期周轉臣已商飭司道督同地方官多招商販由官發給執照分投出口販運並酌量減免釐捐以期踴躍合無仰懇天恩飭下盛京將軍奉天府尹示諭各口文武勿令糧戶遏糶居奇俾資接濟而顧根本目下麥收已形歉薄若旬月內再無透雨大田亦難及時播種尙須另籌補救容臣隨時察看情形妥籌核辦所有現在招商販運奉省雜糧以濟民食緣由理合恭摺覆陳伏乞

皇太后

皇上聖鑒訓示謹

奏